

VERORDENING

Om voorsiening te maak vir 'n brandweerdienst in die //Khara Hais munisipaliteit; en vir aangeleenthede wat daarmee in verband staan.

DAAR WORD BEPAAL deur die //Khara Hais munisipaliteit, soos volg:-

INDELING VAN ARTIKELS

1. Woordomskrywing
2. Samestelling van diens
3. Plig om bystand te verleen
4. Prosedure by uitbreek van 'n brand
5. Belemmering of skade
6. Dra van uniform en kentekens
7. Brandbare materiaal
8. Veiligheid van persele en geboue
9. Uitgange
10. Gasgevulde toestelle
11. Maak van vure
12. Brande in skoorstene, pype en rookkanale
13. Teenwoordigheid van brandweerman
14. Verwydering van vloeistof of ander stowwe
15. Betaling vir bywoning en dienste
16. Vrystelling van betaling van tariewe
17. Vals inligting
18. Telefone, brandalarms en ander toestelle
19. Strafbepaling
20. Kort titel

Woordomskrywing

1. In hierdie Verordening, tensy uit die samehang anders blyk, beteken –

“**brandweerhoof**” die persoon ingevolge artikel 5(1) van die Wet op Brandweerdienste, 1987 (Wet No. 99 van 1987), deur die Munisipaliteit aangestel as hoof van die diens;

“**diens**” die brandweerdienst van die Munisipaliteit ingestel ingevolge artikel 3 van die Wet op Brandweerdienste, 1987 (Wet No. 99 van 1987), wat bedoel is om aangewend te word vir –

- (a) die voorkoming van die uitbreek of verspreiding van ‘n brand;
- (b) die bestryding of blus van ‘n brand;
- (c) die beskerming van lewe of eiendom teen brand of ander dreigende gevaar;
- (d) die red van lewe of eiendom van ‘n brand of ander gevaar;
- (e) behoudens die bepalinge van enige ander wet, die lewering van ‘n ambulansdiens as ‘n integreerende deel van die brandweerdienste; of
- (f) die verrigting van enige ander funksie wat in verband staan met enige van die aangeleenthede in paragrawe (a) tot (e) bedoel;

“**eienaar**” ‘n eienaar soos omskryf in artikel 18(4) van die Wet op Brandweerdienste, 1987 (Wet No. 99 van 1987);

“**goedgekeur**” deur die brandweerhoof goedgekeur;

“**Munisipale Bestuurder**” die persoon aangestel ingevolge artikel 82 van die Wet op Plaaslike Regering: Munisipale Strukture, 1998 (Wet No. 117 van 1998);

“**Munisipaliteit**” die //Khara Hais munisipaliteit;

“**noodgeval**” ‘n geval of gebeurlikheid wat ernstige gevaar vir lewe of eiendom inhou of kan inhou;

“**okkupeerder**” enige persoon wat enige perseel of gedeelte van so ‘n perseel okkupeer ongeag die titel van okkupasie;

“**tariewe**” die tarief van gelde van tyd tot tyd deur die Munisipaliteit bepaal; en

“**Wet**” die Wet op Brandweerdienste, 1987 (Wet No. 99 van 1987).

Samestelling van diens

2. Die diens word saamgestel uit –

- (a) die voltydse lede van die diens deur die Munisipaliteit aangestel ooreenkomstig artikel 6 van die Wet; en
- (b) lede van die brandweer reserwemag, aangestel deur die Munisipaliteit ooreenkomstig artikel 6A van die Wet, as tydelike lede van die diens,

om sodanige werksaamhede te verrig as wat die brandweerhoof van tyd tot tyd aan hulle mag opdra.

Plig om bystand te verleen

3. Enige lid van die diens of van 'n brandweerorganisasie, hetsy dit deur die Munisipaliteit beheer word, al dan nie, moet, wanneer daartoe versoek word deur die brandweerhoof, alle bystand binne sy of haar vermoë verleen in verband met die bestryding of bekamping van 'n brand of enige ander noodgeval.

Prosedure by die uitbreek van 'n brand

4. (1) Waar die diens in kennis gestel word van, of daar rede is om te glo dat 'n brand uitbreek het, of 'n ander toestand ontstaan het waar die dienste van die diens benodig word, gaan die brandweerhoof onverwyld tesame met sodanige personeel en toerusting as wat hy of sy nodig ag, na die plek waar die brand of toestand plaasvind of bestaan, of waar hy of sy rede het om te glo dat dit plaasvind of bestaan.
- (2) Die brandweerhoof kan bevel oorneem van, of inmeng met, of 'n einde maak aan enige bestaande toestand of enige handeling wat verrig word ten opsigte van 'n brand, deur enige persoon wat nie in diens van die diens is nie, insluitende die eienaar van die perseel en sy of haar werknemer of agent, en niemand mag versuim om enige wettige bevel of opdrag na te kom wat deur die brandweerhoof gegee word in die uitvoering van hierdie subartikel nie.

Belemmering of skade

5. (1) Niemand mag met 'n lid van die diens inmeng of hom of haar hinder in die uitvoering van sy of haar pligte ingevolge hierdie Verordening nie.
- (2) Niemand mag 'n voertuig oor enige brandslang bestuur of enige brandslang of ander toestel of toerusting van die diens beskadig, daarmee peuter of hom of haar daarmee inmeng nie.

Dra van uniform en kentekens

6. (1) Die brandweerhoof en elke lid van die diens dra die uniform, rang- en kentekens deur die Munisipaliteit voorgeskryf en verskaf.
- (2) Niemand, behalwe 'n lid van die diens, mag 'n uniform van die diens dra nie, of enige uniform bedoel om die indruk te skep dat hy of sy so 'n lid is dra nie, of op enige ander wyse homself of haarself voordoen as 'n lid van die diens nie.

Brandbare materiaal

7. (1) Waar die brandweerhoof van mening is dat enige persoon –

- (a) enige hout, kratte, voer, strooi of ander brandbare materiaal, hetsy binne of buite enige gebou, berg of veroorsaak of toelaat dat dit geberg word in hoeveelhede of in 'n posisie of op 'n wyse wat 'n gevaar van brand aan enige gebou skep;
- (b) in okkupasie of beheer van enige perseel toelaat dat gras, onkruid, bome of ander plantegroei op 'n perseel groei, of enige rommel daarop laat ophoop op 'n wyse of in hoeveelhede wat 'n brandgevaar vir enige gebou of enige perseel skep,

kan die brandweerhoof, by skriftelike kennisgewing, so 'n persoon gelas om die gemelde brandbare materiaal te verwyder, of om voor 'n vasgestelde datum sodanige ander redelike stappe soos wat hy of sy in sodanige kennisgewing voorskryf, te doen om die brandgevaar te verwyder.

- (2) Waar daar nie aan die voorskrifte van so 'n kennisgewing voldoen word nie, kan die brandweerhoof sodanige stappe doen as wat hy of sy nodig ag om die gevaar te verwyder, en die koste daaraan verbonde word deur die persoon aan wie die kennisgewing gerig was, aan die Munisipaliteit betaal.

Veiligheid van persele en geboue

- 8. (1) Die brandweerhoof kan, wanneer hy of sy dit nodig ag, en te enige tyd wat volgens sy of haar mening redelik is in die omstandighede –
 - (a) enige grond, perseel of gebou binnegaan en –
 - (i) sodanige grond, perseel of gebou inspekteer om vas te stel of enige toestand bestaan wat 'n brand of noodgeval kan veroorsaak of die gevaar kan verhoog van, of bydra tot, die verspreiding van brand of skepping van 'n noodgeval, of die ontsnapping van persone na veiligheid in gevaar kan stel of verhinder;
 - (ii) enige brandalarm, sprinkelblusstelsel of enige ander brandbestrydings- of brandopsporingstoestel inspekteer;
 - (iii) enige vervaardigingsproses wat die gevaar van brand of ontploffing inhou, inspekteer;
 - (iv) die wyse van berging van enige vlambare gas, chemikalieë, olie, plofstowwe, vuurwerke of enige ander gevaarlike stowwe, inspekteer; en
 - (v) enige aanleg wat gebruik maak van enige van die stowwe na verwys in subparagraaf (iv), inspekteer;

- (b) sodanige opdragte gee as wat hy of sy nodig ag vir die vermindering van 'n brand-risiko of vir die beskerming van lewe en eiendom.

(2) Waar die brandweerhoof vind dat op enige perseel –

- (a) enige vlambare, brandbare of plofbare stowwe sò geberg of gebruik word dat die risiko op brand of gevaar vir lewe of eiendom in geval van brand verhoog word; of
- (b) enige toestand of gebruik bestaan, wat na sy of haar mening, waarskynlik sodanige risiko of gevaar kan skep of vergroot of, waarskynlik met die werking van die diens kan inmeng, of die ontsnapping van persone na veiligheid kan belemmer; of
- (c) enige blustoestelle gebrekkig, minderwaardig of van onvoldoende aantal is,

moet die brandweerhoof, behoudens die bepalings van subartikel (3), die eienaar of die okkupeerder van sodanige grond, perseel of gebou opdrag gee om onverwyld sodanige stappe te doen as wat hy of sy nodig ag om die gevaar uit te skakel.

(3) Waar die brandweerhoof in enige gebou of op enige perseel –

- (a) enige versperring op of in enige brandtrap, trap, gang, deur of venster vind; of
- (b) 'n nooduitgang vind wat na sy of haar mening, in geval van 'n brand, onvoldoende sal wees vir die ontsnapping na veiligheid van die getal persone wat waarskynlik te enige tyd in so 'n gebou of op so 'n perseel sal wees; of
- (c) enige ander voorwerp of toestand van 'n strukturele aard of andersins vind wat, na sy of haar mening, die brandrisiko of die gevaar vir lewe of eiendom kan vergroot; of
- (d) vind dat 'n brandalarm of ander stelsel van kommunikasie benodig word,

stel hy of sy die eienaar of okkupeerder van so 'n gebou of perseel skriftelik in kennis van sy of haar bevindings en vereis van hom of haar om binne 'n tydperk in die kennisgewing vermeld, sodanige stappe as wat in die kennisgewing vermeld word, te doen om die wantoestand reg te stel, op die koste van so 'n eienaar of bewoner.

- (4) Waar die eienaar of okkupeerder versuim of weier om binne 'n redelike tydperk te voldoen aan 'n opdrag gegee ingevolge subartikel (2), of om binne die tydperk vermeld in 'n kennisgewing ingevolge subartikel (3), gevolg te gee aan die vereistes daarin vermeld, kan die Munisipaliteit sodanige stappe doen as wat, na die mening van die brandweerhoof, nodig is om die risiko of gevaar te verwyder en die Munisipaliteit kan enige uitgawe aangegaan, verhaal van sodanige eienaar of okkupeerder.

Uitgange

9. Elke deur wat 'n ontsnappingsroete na veiligheid vanuit 'n openbare gebou bied, word ongesluit gehou en word duidelik aangedui met goedgekeurde uitgangtekens: Met dien verstande dat so 'n deur gesluit kan wees deur middel van 'n goedgekeurde toestel op so 'n wyse geïnstalleer dat so'n deur te alle tye van die binnekant van so 'n gebou oopgemaak kan word.

Gasge vulde toestelle

10. (1) Niemand mag enige ballon, speelgoed of ander toestel met vlambare gas vul, sonder die skriftelike toestemming van die brandweerhoof, wat sodanige voorwaardes kan opleë as wat hy of sy mag vereis, met inagneming van al die omstandighede van die geval.
- (2) Niemand mag enige ballon, speelgoed of ander toestel wat met vlambare gas gevul is, aanhou, berg, gebruik of vertoon of toelaat dat dit aangehou, gebruik, geberg of vertoon word op of in enige grond, gebou of perseel waartoe die publiek toegang het of wat as 'n klub of enige plek van samekoms gebruik word nie.
- (3) Niks in hierdie artikel vervat, word so uitgelê dat dit die gebruik van ballonne wat met waterstof gevul is vir weerkundige of ander *bona fide* wetenskaplike of opvoedkundige of ander doeleindes, verbied nie.

Maak van vure

11. (1) Niemand mag 'n vuur maak of toelaat of veroorsaak dat 'n vuur gemaak word, in 'n plek of op 'n wyse wat 'n gevaar skep vir enige gebou, perseel of eiendom nie.
- (2) Behoudens die bepalings van enige ander wet, mag niemand sonder die skriftelike toestemming van die brandweerhoof enige vuilgoed, hout, strooi of ander materiaal in die buitelug verbrand of veroorsaak, of toelaat dat dit gedoen word nie, behalwe vir doeleindes van voedselbereiding.
- (3) 'n Toestemming ingevolge subartikel (2) verleen, is onderhewig aan die voorwaardes wat die brandweerhoof opleë.

Brande in skoorstene, pype en rookkanale

12. Geen eienaar of okkupeerder van 'n gebou mag toelaat dat roet of enige ander brandbare stof in enige skoorsteenpyp of rookkanaal van so 'n gebou versamel in hoeveelhede of op so 'n wyse dat dit 'n gevaar van brand inhou nie.

Teenwoordigheid van brandweerman

13. (1) Waar daar by 'n byeenkoms, gehou by 'n plek van vermaaklikheid of ontspanning, uitgesonderd 'n filmvertoning in 'n bioskoop of 'n opvoering in 'n teater, waarskynlik 'n honderd of meer persone teenwoordig sal wees, moet die persoon wat sodanige byeenkoms belê, 'n skriftelike kennisgewing, minstens 48 uur voor sodanige byeenkoms, aan die brandweerhoof aflewer waarin die tyd en die perseel waarop sodanige byeenkoms gaan plaasvind, gemeld word.
- (2) Waar, na die mening van die brandweerhoof, die teenwoordigheid van 'n brandweerman op grond van veiligheid noodsaaklik is, kan hy of sy een of meer brandweermanne voorsien om teenwoordig te wees op enige perseel vir die volle duur of gedeelte van die byeenkoms.
- (3) Die persoon in beheer van sodanige byeenkoms, betaal aan die Munisipaliteit die tariewe uiteengesit in die toepaslike tarief.

Verwydering van vloeistof of ander stowwe

14. Die brandweerhoof kan, op versoek van die eienaar of okkupeerder van enige perseel, enige vloeistof of ander stof uitpomp of op 'n ander wyse vanaf so 'n perseel verwyder, teen betaling van die gelde uiteengesit in die tarief.

Betaling vir bywoning en dienste

15. (1) Behoudens die bepalings van artikel 16, moet die eienaar of okkupeerder van grond of 'n perseel, of beide sodanige eienaar en okkupeerder gesamentlik en afsonderlik, of die eienaar van 'n voertuig, na gelang van die geval, waarvoor of in verband waarmee die bywoning van die diens versoek is of enige dienste gelewer is, aan die Munisipaliteit vir sodanige bywoning of diens, insluitende die gebruik en voorsiening van water, chemikalieë, uitrusting en ander middele, die tariewe betaal wat die brandweerhoof as verskuldig vasstel in ooreenstemming met die gelde uiteengesit in die tarief.
- (2) Nieteenstaande die bepalings van subartikel (1), kan die brandweerhoof die hele of 'n gedeelte van die tariewe soos beoog in artikel (1) aanslaan: Met dien verstande dat sodanige gedeelte nie meer as negentig persent laer mag wees nie as die totaal van tariewe wat ingevolge subartikel (1) betaalbaar sou gewees het: Met dien verstande voorts dat by die aanslaan van sodanige tariewe of gedeelte daarvan, behoorlike aandag benewens ander toepaslike faktore, geskenk moet word aan –

- (a) die feit dat die bedrag so aangeslaan eweredig met die gelewerde diens moet wees;
- (b) die wyse en plek van oorsprong van die brand: en
- (c) die verlies vir die persoon aanspreeklik om die tariewe te betaal wat deur die brand veroorsaak kon gewees het indien die dienste nie gelewer was nie.

Vrystelling van betaling van tariewe

16. Nieteenstaande die bepalings van artikel 15 is geen tariewe betaalbaar nie –
- (a) waar 'n vals alarm te goeder trou gemaak is;
 - (b) waar die diens benodig is as gevolg van burgerlike opstand, oproer of natuurlike ramp;
 - (c) waar die diens gelewer is in belang van openbare veiligheid;
 - (d) waar die brandweerhoof van mening is dat die diens wat gelewer is van 'n suiwer menslike aard was of gelewer is uitsluitlik om 'n lewe te red;
 - (e) deur die eienaar van 'n voertuig, indien hy of sy tot die bevrediging van die brandweerhoof, bewys lewer dat sodanige voertuig gesteel is en dat dit nog nie deur hom of haar teruggevind is ten tye van die lewering van die diens ten opsigte daarvan nie;
 - (f) deur enige persoon, insluitende die Staat, waarmee die Munisipaliteit ingevolge artikel 12 van die Wet 'n ooreenkoms aangegaan het, waarby die dienste van die diens beskikbaar gestel word aan so 'n persoon teen betaling soos bepaal in sodanige ooreenkoms.

Vals inligting

17. Niemand mag opsetlik aan enige lid van die diens, enige kennis gee of enige inligting verskaf in verband met die uitbreek van 'n brand of van enige ander noodgeval wat die teenwoordigheid van die diens benodig, wat volgens sy of haar kennis, vals of onjuis is nie en sodanige persoon is, nieteenstaande die bepalings van artikel 16, aanspreeklik vir betaling van die uitroepgeld voorgeskryf in die tariewe.

Telefone, brandalarms en ander toestelle

18. (1) Die Munisipaliteit kan enige telefoon, brandalarm of ander toestel vir die geleiding van oproepe met betrekking tot brand, asook enige kennisgewing wat die naaste brandkraan of ander brandbestrydingstoerusting aanwys, aan enige gebou, muur, heining of ander struktuur aanheg of daarvan verwyder.

- (2) Niemand mag enigiets wat aangeheg is ingevolge subartikel (1) beweeg, verwyder, skend, beskadig of daarmee peuter nie.

Strafbepaling

19. Enige persoon wat 'n bepaling van hierdie Verordening oortree of versuim om daaraan te voldoen, is aan 'n misdryf skuldig en by skuldigbevinding strafbaar met 'n boete, of by wanbetaling, met gevangenisstraf vir hoogstens 6 maande of tot beide 'n boete en sodanige gevangenisstraf.

Kort titel

20. Hierdie Verordening heet die Brandweerverordening, 2007.